

**Gagauziya öndercileri
Avdarma küüyündä
COVID-19-za parasız
test yapmak merkezini
kapattılar. Neçin???**

Başlayıp Küçük ayın 2-dän Avdarma küüyündä, küüyün meñenatın parasınan (esap alın – diil Gagauziya bütetindan paraylan!!!) başladığı işlemää COVID-19-za parasız test yapmak merkezi.

Meñenat aldıydı 6 bin liñenziyalı test, liñenziyalı oborudovaniye, doktorları hem insannarı korumak ekipirovkasını da, saalık hem epidemiyaya karşı savaşmak kurallarına uyup, bu test merkezini kurduydı (bak: https://www.youtube.com/watch?v=bcaDb6cmKKs&feature=emb_logo).

Bu merkezde avdarmalıları COVID-19-za hem ona karşı antikaralara parasız test yapmaa başladıldılar. Sekiz gündä 296 insana testlar yapıldı, ama...

Ama lafta “halk için izmet edän” hem “insannarı sizim-bizim olarak bölmeyän” Gagauziya öndercileri, kız-kançlıktan mı, osa gagauz halkından azetmedikleri için mi, bu merkezi kapattılar.

Avdarma küüyündän Gagauziya Halk Topluşun deputatı Elena KARAMİT, küülülärä danışarak, açıktan söledi kim bu işi yaptırdı: *“Bulundu bir insan Komratta, kim bu işi beenmedi... İnsanın arasında o her sıra yalpak, lafeder gözäl, gülümseer, ama arkadan urêr!”* (bak: https://www.youtube.com/watch?v=4ygrgPXD-Cs&feature=emb_logo).

Nicä kapandı merkez annattı merkezin zaametçiykası Lidiya MARİNOVA: https://www.youtube.com/watch?v=YjvsBO35Ef0&feature=emb_logo.

Şindi bu test merkezindän bütün testları zar-zor küüyün medişına postuna kablettirdilär. Buna da Komrattan gülär üzlülükyä izin vermää istemäzdi. Kinnää bakın!

Bän çok işlär ömürümdä gördüm, ama bölä hayınnık hem kinnik, bukadardan gagauz halkını sevmemäk, bukadardan zihirlän nestä dolaylara serpitmäk bir gülär ikiüzlü insanda olsun – bölä iş ilk kerä görerim.

Demeli bölelerini da Allaa yaratmış: Allaa mı osa kuyruklu mu? Bu da belli diil.

Ama bir kişide bukadardan kötülük toplanması da olmaz! Osa olur mu? Burada eridir sizin aklınıza getirelim Ulyam ŞEKSPİRİN (William Shakespeare) “Gamlet” tragediyasından bir cümle: *“Dostum Garaşio, bu dünneyde var çok işlär, / Anı bizim bilgiçlerä hiç düşlerde da gelmedi!”*

Akademik Todur ZANET

Ekmek dünneyi tutêr – Ankaradan pak un geler



Bıldır, Kırım ayında, Çeşmä küüyün istoriya hem tarafı aaraştırma muzeyinde oldu paalı bir sıra –“Ekmek – dünnä temeli!”, angısını, dördüncü klasın üürencilerinnän bilä, hazırladı küü liñeyin başlangıç klaslarında üürediciykası Ekaterina Petrovna BERBER. Şindi da Çeşmä küüyün primarından, Sofya Vasilyevna JEKOVAĐan, geldi haber, ani orayı, TİKA aracılınnan Ankara Gölbaşı primariyasından 50 ton pak unu yardımı geler. **4-cü sayfa**

İrina VLAHın Ankarada gezisi Üüredicilik kompleksından COVID-19 vaktınalarından

Küçük ayın (fevral) 21-23 günnerinde Gagauziya Başkanı İrina VLAH yaptı bir gezi Ankaraya, neredä buluştu Türkiye Respublikası Prezidenti Recep Tayyip ERDOĞAN, Türkiye Respublikasının dışışleri Bakanı Mevlüt ÇAVUŞOĞLUyan, Türk İşbirlii hem Koordinaşıya Agenstvusu (TİKA) Başkanı Serkan KAYALARlan, Türkiye Respublikasının Sport hem gençlik Bakanı Mehmet Muharrem KASAPOLUyan.



Türkiye Respublikası Prezidenti Recep Tayyip ERDOĞAN, Gagauz Yeri Başkanı İrina VLAHı kabul etti zaman

Bakmadaan ona, ani Gagauziya Başkanın Ankaraya gezisi hem gezi programası saklıda tutuldu hem onun için öncedän birerdä bişey açıklanmadı, belliydi, ani, temel olarak, onun konusu olacak COVID-19-za karşı koymakta yardım istemesi. Çünkü vizit öncesindän bunu vardı nicä annamaa Gagauziya öndercilerinin ilersi günnerde yaptıklarından – Avdarma küüyündä COVID-19-za testların laboratoriyasının zorlan kapatmalarından hem Başkana izmet edän saytın geziya yollanma gününde COVID-19 için maasuz yazılarından (bu işlär için taa derindän bakın saytıımızda hem okuyun büünkü sayfalarımızda).

İrina VLAHın Ankara gezisi için taa detallı okuyun 5-ci sayfada

GHTya eni seçimnerin gününä köstekli yol

Şindiki VI-cı çaarılmalı Gagauziya Halk Topluşun etkilii 2021-ci yılın Büük ayın (yanvar) 20-dä bitti da Gagauziyada läüzim HalkTopluşuna eni deputatkar ayırılısın. GHTya eni seçimnär ilktän läüzimdi olsun 2021-ci yılın Çiçek (aprel) ayın 4-dä. Şindi da karar alındı onnarı Hederlez (may) ayın 16-da yapmaa. Nicä bu iş oldu okuyun aşadaki kısa haberlerdän.

Küçük ayın (fevral) 3-dä Gagauziya Halk Topluşu üstolan tolantısında aldı karar, ani 04.04.2021 gününä koyulan Halk Topluşuna eni seçimneri, şindilik, yapmamaa.

Bu karara, allelem, en çok sevindi Gagauziya Başkanı hem soşialistlar partiyası, zere belli, ani bitki vakıtlarda halka karşı kendi yaptıklarının onnar diil ani avtoritetlerini, ama üzlerini da büünkü gündä batac içinä düşürdüler, da onnara läüzim vakit bu avtoriteti biraz tertiplemäa hem suratlarını paklamaa.

Açıktan belliydi, ani bütün Gagauziya Halk Topluşu üstolan tolantısında yukardan, 3-cü kattan, iplär çekilirdi da hem agauziya Halk Topluşu Baş Vladimir KISSA hem da Gagauziya Başkanın hem soşialistlar partiyasının adamnarı cambaz gibi oynardılar hem işi bu karara götürdiler.

Nicä da olsa, kuvettä bulunannar kendi adamnarının bilä Küçük ayın (fevral) 3-dä bu düüşü ensediler da kendilerine pek läüm olan zamanı genä kazandılar.

Küçük ayın (fevral) 5-dä seçimnärän hem Gagauziyanın 2021-ci yılına büteti Zakonu proekrınan ilgili soruşlar başladılar tabannarı yakmaa da Gagauziya Halk Topluşu Baş Vladimir KISSA ansızdan topladı GHT Prezidiumunu hem Gagauziya İspolkomun kimi temsilcilerini bir dernäa, neredä karar alındı hemen, bir aftanın içindä, Halk Topluşunu iki kerä toplamaa.

O afta Gagauziya Halk Topluşu ilk kerä toplandı Küçük ayın (fevral) 9-da, neredä bakıldı Merkez Seçim Komisiyasının konusu. Taa doorusu o komisiyaya taa dört kişinin seçilmesi ortaya koyuldu hem yapıldı. İkinciläa da Gagauziya Halk Topluşu toplandı Küçük ayın (fevral) 12-dä, "Gagauziyanın 2021-ci yıla büteti" için Gagauziya Zakonun proektını hem Halk Topluşuna seçimnerin smetasını kabletmäa deyni. Bütet o günü da kabledilmedi.

Ama o toplantıda karar alındı Gagauziya Halk Topluşuna seçimneri 2021-ci yılın Hederlez (may) ayın 16-da yapmaa. Bu karar için 25 deputat elini kaldırdı.

Hep o toplantıda deputatlar karar aldılar Gagauziya Halk Topluşu seçimneri için GHT Prezidiumun rezerva fondundan 3 milion 778 bin ley almaa da seçimneri yapmaa.

Elena KARAMİT: "Başkan için kompromis – yumup göslerini, onun teklifini kabletmäa!"

2021-ci yılın Küçük ayın (fevral) 17-dä Gagauziya Halk Topluşun beş deputatı Ekaterina JEKOVA, Elena KARAMİT, Mihail JELEZOGLU, Aleksandr TARNAVSKIY hem Sergey ÇİMPOEŞ yaptılar ortak bir brifing, neredä açıkladılar kendi bakışlarını Gagauziya Başkanı İrina VLAHın tarafından Gagauziyaya hem Halk Topluşuna karşı yapılan kösteklerine hem para süzmäk istemesinä.

Brifing taa ilgiliydi 2021-ci yıl için bütetin kabledilmesindä Gagauziya Başkanı tarafından Gagauziya Halk Topluşuna hem GHT deputatlarına GRTdan hem Başkanın saytlarından batac atmasınan hem yalan dökmesinnän, maamilä surat GHT deputatlarını kompromisa çaarak. Ama nesoy kompromis o isteer? Buna cuvap etti GHT deputatı Elena KARAMİT: "Başkan için kompromis – yumup göslerini, onun teklifini kabletmäa!"

Bundan kaarä her bir deputat açıkladı o işleri, angıların yapılmasında hem kabledilmesindä Gagauziya Başkanı duşmannık gösterdi, ama onnar GHT tarafından kabledildiynän hem yapıldıynan o hemen o işleri kendisi yapmış gibi gösterdi. O işlerin arasında şkolalarda uşakları doyurmak, külerimizin sokaklarını aydınlatmak h.t.b.



Nicä açıkladılar brifingta pay alan deputatlar, Gagauziya Başkanı başkannı zamanında Gagauziyanın kuvetlerini daattı hem şimdi da isteer ölä bir bütet kabledilsin, ani Gagauziyayı hem Gagauz Halkını heptän fıkartalaa sokup, onu bitkiyädän soymaa.

Saymayınız zaametinizi da

GHT deputatların Ekaterina JEKOVA'nın, Elena KARAMİT'in, Mihail JELEZOGLU'nun, Aleksandr TARNAVSKIY'in hem Sergey ÇİMPOEŞ'in ortak brifingini buradan bakın: https://www.youtube.com/h?v=rAASoIoEuW4&feature=emb_logo.

Nikolay İVANÇUK: "Ya kabledin, yada sauşun tılsımnara!"

Küçük ayın (fevral) 26-da olan Gagauziya Halk Topluşun sıradan dışarı toplantısında Çadır kasabasından deputat Nikolay İVANÇUK dedi: "İspolkom büteti bizä soktu da dedi: ya onu kabledin ölä nicä verdik, yada sauşun tılsımnara! Bizä sölerler, ani ekonomikada kalkınma olaceymış.

Hepsi bizim komşularda Rusiyada, Ukraynada, Rominiyada ekonomika düşer. Biz sa üüselmäk için lafederiz. Onnar lafeder kompromis için, ama kompromisä gelmäa istämeerler. Bu bütet haydutluk büteti, onuştan onun için bän oy vermeyecäm".

Sanêrınız Başkan verildi mi? Verecek mi? Ne verildi, ne da verecek!

Geçennerdä Gagauziya Halk Topluşu deputatı Ekaterina JEKOVA açıkladı, ani Gagauziya Başkanı hem İspolkom yalancılıktan savaşırlar Halk Topluşuna 143 milion 250 bin leylik defititli büteti kablettirmäa, bakmadaan ona, ani cümne önünä ilktän sürüldüydü hem hepsi proşeduraları geçtiydi defititsiz bütet.

Tutêrsınız mı aklı-nızda, nicä büyük bas-kıylan Gagauziya Başkanı hem GHTda onun adamnarı savaşırdılar bu 143 milion 250 bin-nik boyundruu gagauz halkın boynusuna asmaa? Nekadar üüsektän bakmak hem batac atmak GHT deputatlarına oldu? Nekadar iirinç teatrlar yapıldı? Nekadar laf sölendi?

Etiştıydi ona, ani İspolkom, sansın kıyat oyununda, kozlardan gitmäa başladı: bu 143 milion 250 bini kabletmäarsalar gagauz dili (!!!) üüredicilerin zarplalarını kesecekler (bak: <https://gagauzinfo.md/top1/58-064-posledstviya-resheniy-deputatov-nsg-po-byudzhetu-uchitelya-gagauzskogo-yazyka-mogut-lishitsya-chasti-zarplat.html>).

Görünceä, ani GHT deputatları verilmeerler, sansın bişey olmamış



gibi, İspolkom, sansın ne suvan imiş hem ne suvana kokêr, Küçük ayın (fevral) 9-da ansızdan, sansın ayarak, döndü o ilk zakonca cümneyä sürülän denkli bütetä (bak: <https://gagauzinfo.md/top1/58251-ispolnitelnyy-komitety-vnes-v-narodnoe-sobranie-proekt-bez-deficitnogo-byudzheta.html>).

Bu günnerin içindä ne dişti acaba: padişah mı, osa eşek mi öldü?

Sanêrınız Başkan verildi mi? Verecek mi? Ne verildi, ne da verecek!

Bileräk, ani Gagauziya Başkanı

bişeycik boşuna yapmêr, dedik: bir bakalım tıfralara. Da ne gördük? Dooru 143 milion 250 bini hiç biri bireri sıbtımadı!!! Taa da beter – onu 150 miliona çıkardılar!!!

Şindi bakın islää!

İki ay geeri İspolkom 2021-ci yılın bütetini bölä teklif ettiydi:

1 miliard 134 milion 555 bin ley = 991 milion 350 bin ley (gelir payı) + 143 milion 250 bin ley (defitit)!!!

Şindi ne teklif ediler: **1 miliard 149 millionuk 881 bin 400 leylik** defititsiz bütet.

Bişey esap aldınız mı? Herliim **991 milion 350 bin** ley aslı bir tıfara sa: ozaman eni teklif edilän bütetin defititi diil 143 milion 250 bin ley, ama **158 milion 531 bin** ley! Ne de-yeceniz?!

Bu pek benzeer Eski Sovetler devletlerinde tükännarda yapılan ucuzlama satışlarına, açan malın paasını üüsel dip, her tarafa baarêrlar, ani ucuzlama var. Cambazlaa bakın!

Todur ZANET

GAGAUZİYA'nın 2021 YILI BÜCETİ: GHT deputatları üstünä baskı hem cambazlık genä geçmedi

2021-ci yılın Küçük ayın (fevral) 26-da genä oldu Gagauziya Halk Topluğun sıradan dışarı toplantısı, neredä incelendi sade bir soruş – “Gagauziyanın 2021-ci yıla bütetü” için Gagauziya (Gagauz Yeri) Avtonom-teritorial Bölgesinin (ATB) Zakonun proektü.

Bakmadaan ona, ani bu yıl Bükük ayın (yanvar) 26-da Halk Topluşu 21 oylan Gagauziyanın 2021-ci yıla **1 miliard 6 milion 350 bin** leylik defitşiz bütetüni artık birinci okumakta kabletti, Küçük ayın (fevral) 26-da, GHT'nin ekonomika politikası, investitiya çekmesi, bütet, para hem regionun ilerlemesinde Komisiyanın başı Födör YANIÖGLÜ teklif etti enidän kabletmää bir şişirmä bütetü, neredä teklif ediler **1 miliard 149 milion 881 bin 400 leylik**, maamilä surat, defitşiz bütet.

Ama bu kere dâ Gagauziyaya Başkanın Gagauziyaya son uruşu geçmedi. Bakmadaan ona, ani İrina VLAHın taraftarları hem Gagauziyanını nestä deputatları türlü mindar laflarlan azarlardı o deputatları, kim karşı koydu hem koyardı bu şişirmä bütetü, bu tıtsi baskı hem cambazlık geçmedi. Deputatlar bu kerä da kabletmedilär Gagauziyayı yok edän bütetü. Saa olsunar.



Keleperi yutmadaan, Gagauziyanın şişirmä bütetü karşı ellerini kaldırdılar halkımızın lafta diil, ama iştä haliz patriotları hem koruyucuları: Sergey ÇERNEV (Valkaneş kasabası, 8-ci seçim bölümü [s/b]), **Sergey ÇİMPÖŞ** (Tomay küüyü, 35-ci s/b), **Nikolay İVANÇUK** (Çadır kasabası, 5-ci s/b), **Ekaterina JEKOVA** (Çeşmä

küüyü, 16-ci s/b), **Elena KARAMİT** (Avdarma küüyü, 11-ci s/b), **Georgiy LEYÇU** (Çadır kasabası, 6-cı s/b), **Mihail MANOLOV** (Kongaz küüyü, 27-ci s/b), **İlya UZUN** (Rus Köselisi küüyü, 33-ci s/b).

Gagauziya Başkanın kelepirini yuttular hem Gagauziya için zararlı olan bütet için oylarını verdilər: Petr

ÇAVDAR (Svetloe küüyü, 34-cü s/b), **Nikolay DRAGAN** (Kıpçak küüyü, 30-cu s/b), **Vitaliy DRAGOY** (Komrat kasabası, 1-ci s/b), **Pötr FAZLI** (Valkaneş kasabası, 10-cu s/b), **Ruslan GARBALI** (Çadır kasabası, 7-ci s/b), **Valentin GAYDARCI** (Kırbalı küüyü, 23-ci s/b), **Grigoriy DÜLGER** (Beşalma küüyü, 13-ci s/b), **Grigoriy KADIN** (Baruç küüyü, 12-ci s/b), **Vladimir KISSA** (Bucak küüyü, 15-ci s/b), **Dimitriy MANASTIRLI** (Kıpçak küüyü, 31-ci s/b), **Nikolay ORMANCI** (Kırlannar (Kotovskoe) küüyü, 32-ci s/b), **Stepan SARIÖGLÜ** (Baş küüyü (Kırsovo), 26-cı s/b), **Grigoriy UZUN** (Valkaneş kasabası, 9-cu s/b), **Födör YANIÖGLÜ** (Çok Maydan küüyü, 17-ci s/b), **Sergey ZAHARIYA** (Kongazçık küüyü, 29-cu s/b), **Konstantin ZLATOV** (Komrat kasabası, 2-ci s/b).

İkiliktä kalan: Nikolay RAYA (Dizgincä küüyü, 18-ci s/b).

Bu büünkü toplantının sonuçları. Toplantıdan sora, annaşıldı, ani deputatlar genä danışma yapaceklar, ki Gagauziya Halk Topluğun sıradan dışarı toplantısı bir-iki aftadan sora genä olsun.

Konstitütiya sudu dedi: “Olamaz!”

Prezident dedi: “Olur!”

Bakmadaan ona, ani Premyer-ministrulaa kandidat seçilmedii zaman, Moldova Parlamenti 54 imzayan Premyer-ministrulaa Mariana DURLEŞTÂNÜYU kandidat koydu, Moldova Prezidenti tekrar kendi kandidatını ortaya çıkardı.

Bu işin Konstitütiyaya ters olduunu açıklayarak, Soşialistlar Konstitütiya suduna danıştılar da Küçük ayın 23-dä bu sud karar aldı, ani Natalya GAVRİLİTANIN ikincilää kandidat koyulması zakonsuz hem Prezident läâzım Parlamentiın kandidatını kabletsin.

Moldova Prezidenti buna dedi, ani ozaman hiç bir kandidat ortaya çıkarımayacak da bekleyecek Baba Marta ayın 23-nü, açan bu uura kandidatı ortaya koymaa deyni zaman bitecek.

“Moldova Pravitelstvusu – Moldova Parlamenti” birinci perdä esap 0:101!

Küçük ayın (fevral) 11-dä Moldova Parlamentında läâzımdılar kabul etsinnär yada kabul etmesinnär Moldova Prezidenti Maya SANDU tarafından teklif edilän eni Pravitelstvoyu. Ama ne oldu parlamentta o günü girecek her bir istoriya, parlamentarlık hem zakonculuk kıyatlarına.

Parlamenta kendi kabinetinnän gelän Premyer-ministrulaa kandidat Natalya GAVRİLİTA, tribuna-ya çıkıp, açıkladı, ani onnar geldilər, ki onnar için oy verilmesin!

Taa ötää Moldova Parlamentiında olan tragikomedianın yanında Şekspir, Molyer, Rasin dinnenerlər. Son sonunda “Pravitelstvoyu kabletmäk” spektaklisinin birinci perdesi 0:101 esaplan bitti – kandidat-



lara hiç biri bir da oy vermedilär ne onnarın partiyalarından deputatlar, ne

da kalanı. Bakalım spektaklinin ikinci perdesi neylän bitecek.

Sanamayın, ani bu oldu Moldova Prezidentiın Maya SANDUNUN taratması – o bunu da beklardı, çünkü açıktan söyleer, ani Moldovada eni Parlament seçimneri läâzım olsun. Da, bakmadaan ona, ani bu arada Soşialistlar, kendi kafadarlarınnan “Şor” partiyasının hem iki baamsız deputatları, ortaya çıkardılar Premyer-ministrulaa başka bir kandidatını – Mariana DURLEŞTÂNÜYU, Moldova Prezidenti kendi insanını, Natalya GAVRİLİTAYI, tekrar Premyer-ministru kandidat koydu.

Foto: NewsMaker

Moldovada COVID-19 lageri genä insannarı içinä aldı!

26.02.2021. Moldovanın Cümne saalında Üstolan Durumu (ÜD) komisiyanın COVID-19 pandemiyanın ilgili bükü kararına görä Baba Martanın 1-15 günneri arası Moldovada her bir iş kapanêr.

Moldovanın Cümne saalında Üstolan Durumu (ÜD) komisiyanın kararına görä şkolalar, lişeylər, koleclar hem universitetlar onlain üürenmeyä geçiriler. Şkola predmetlarında Olimpiadaları var nicä yapmaa sade onlain rejiminde.

Hepsi teatrlar, konşert yapılan binalar hem kultura evleri siiredicilər için kapanêrlar.

Cumêrtesi-pazar günnerinde cümne transportu gezmeyecek.

Devlet hem özel kuruluşlar hepsi “uzaktan işlemeyä” geçerlər. İş erinä var nicä gelsin sade läâzımını uurda minimum kişi.

2021-ci yılın Baba Marta ayın 5-dän beeri Moldovaya girmää deyni hepsi vatandaşlarda läâzım olsun 72 saat içinde yapılmış COVID-19-za negatif testlar. Bu geçerli diil sade 5 yaşınadan uşaklara, halklararası uurunda işleyän şöförlara, eraplannarlan gemilerin ekipajlarına hem izmetçi

personalına, trennerin brigadalarına hem onnarın izmetçi personalına, delegatıyalar azalarına, sınır yakınında çalışan işçilerä, Moldovadan geçän tranzit yolculara hem onnara, kim becerecek gösteremää, ani COVID-19-za karşı vakfınası var.

Aşırdan evä gelän Moldova vatandaşlarında COVID-19-za test olmarsa, ozaman onnar läâzım olacak kendileri 14 günä kendisini kapama rejimine geçsinnär.

26.02.2021 günü Moldovada COVID-19 durumu bölä:

ulaşannar – 183338;

ölennär – 3899;

alışannar – 164888.

Gagauziyada ulaşannarın sayısı – 5201:

Çadır rayonu – 1688;

Komrat rayonu – 2656;

Valkaneş rayonu – 857.

Ulaşannarın arasında:

adam kulluu – 75908 (ölän – 1993);

karı kulluu – 107430 (ölän – 1906);

aar kalan karılar – 833.

Ekmek dünneyi tutêr – Ankaradan pak un geler

Gagauziyanın Çeşmə küüyü hem Türkiyenin Ankara Gölbaşı primariyaları diil çoktan kardaş primariyaları oldular. Şindi da bir kardaştan öbürünä, Gölbaşı primariyasından Çeşmə küüyünä, TİKA aracılıyan, 50 ton pak unu yardımı geler.

Nicä bildirdi Çeşmə küüyü primarı Sofya Vasilyevna JEKOVA “bu yardım geler primariyanın tarafından kurulan yaşlılara deyni soñal programasının çerçevesindä. Bu programaya görä küüyün pekarnisindä taazä ekmek pişiriler hem yaşlı çeşmäküülülere parasız veriler”.

Son alınan bilgilerä görä, Gölbaşı belediye Başkanı Ramazan ŞİMŞEK bildirdi, ani bu pak unu için para



TİKAYA artık aktarıldı da TİKA Kişnev programaların koordinatorluu

Çeşmə küüyün bu soñal programası için pak ununu alacak.

Başkandan ödüllär yaamuru

Küçük ayın (fevral) 18-dä Gagauziyada genä Gagauziya Başkanından ödüllär yaamuru yaadı.



Gagauziyanın zaametçi insannarına ordennar, kıymetli adları hem gramotalar verildi. Verilmä sırası Gagauziyanın Regiona resim Galereyasında oldu. **7-ci sayfa**

Türkiyedä gagauzlar için eni kıyat – “GAGAUZLAR”

Geçennerdä Türkiyenin Selenge basım evindä tipardan çıktı gagauzlar için eni bir kıyat – “GAGAUZLAR”, angısını hazırladı hem yazdı Türkiyenin Uşak Universitetin İstoriya bölümündän Dr. Selcen Özyurt ULUTAŞ.



Kyadı yazmaa deyni Dr. Selcen Özyurt ULUTAŞ, Gagauziyaya gelip, gagauzların yaşamasın hem durumunu kendi gözünän gördü hem bu uurda kıyadını da hazırladı.

Nicä açıklanêr kıyadın tanıtım yazısında, bu kıyat gagauzların kultura-sını, istoriyasını, cümne hem politka durumnarını açıklêr.

Stepan TOPALın adı Komrat uşak başçasına veridi

Komrat muniñipiyinin kararınan Komradın 9-cu uşak başçasına veridi komunist partiya-sının rayon komitetinin azasının hem taa sora Gagauz Respublikasının raametli prezidentinin Stepan TOPALın adı.

Nicä açıkladı Komrat muniñipiyi bu iş yapıldı o üzerä, ani bu uşak başçası bulunêr Stepan TOPALın yaşadı evin yakınnarında hem yaşamasındı o sık uurarmış burayı.

Semön POMETKOnun anmasına tombarlak masa



Küçük ayın 5-dä Komrat regional resim Galereyasında yapıldı tombarlak masa, neredä anıldı gagauz kultura-sının büyük adamı, gagauz “Düz Ava” ansamblisinin kurucusu “Maestro in arta” – Semön Vasilyevič POMETKO.

Tombarlak masada pay aldılar

maestronun karısı Mariya Vasilyevna POMETKO, kakusu Praskovya Vasilyevna KUNÇEVA (Pometko), batısu Pötr Vasilyevič POMETKO, Gagauziya kultura hem turizma Upravleniyanın başı Marina SEMENOVA, “Semön POMETKO” adına “Düz

Ava” ansamblisinin öndercisi Tatyana ŞÇEGOLEVA, “Serin Su” ansamblisinin öndercisi Födör RADİONOV, ho-reograf hem baletmeyster Konstantin GERMEK, “Düz Ava” ansamblisinin muzıkantları hem başka kultura insannarı. **PATRET: kultura-ge.md**

KDU 31 yılı erinä, neçin sa 30 yılını kutladı?

1990-cı yılın Orak aın (iyül) 22-dä Gagauz Halkın Üstolan Syezdın III-cü toplantısında Gagauzlar kurdular kendi Milli Universitetini, angısının temelindä büm işleer Komrat Devlet Universiteti.



Ama, 2021-ci yılın Küçük ayın 11-12 günnerindä, Komrat Devlet Universitetinde, neçin sa, universitetin 31-ci yldönümümü erinä 30-cu (???) yldönümünü kutladılar.

Kutlamaların birinci günündä oldu yortulu toplantı, angısı başladı Mol-

dovanın hem Gagauziyanın gimnalarından. Ama Komrat Devlet Universitetin kendi Gimnası, angısını yazdılar poet – Todur ZANET hem kompozitor – İlya FİLEV hem angısı Universitet tarafından ofiñal kabledildi, neçin sa çalınmadı.

Kutlamaların toplantısında, universitetin zaametçilerindän kaarä, pay aldılar: Moldova Respublikası üre-dicilik, kultura hem aaraştırma ministrusu Liliya POGOLAŞ, Moldova Prezidentin üre-dicilik hem aaraştırma uurunda danışmanı Liliana NİKOLESKU-ONUFREY, Gagauziya Başkanı, Gagauziya Halk Topluşu Başı, Komrat Primarı, Türkiye Respublikasının Komrat Başkonsulu Hasan AKDOĞAN, Moldovada kimi büyükelçilär hem kimi Universitetların rektorları.

Toplantının açılış nasaatını yaptı hem sora kutlama baaşışlarını kabletti Komrat Devlet Universitetin rektoru Prof. Dr. Sergey ZAHARIYA.

Butün kutlama zamanında şenada bulundu Gagauziyanın “Semön POMETKO” adına “Düz Ava” türkü hem oyun halk ansamblisi.

Küçük ayın 12-dä kutlamalar onlain Halklararası bilim-praktika konferenñiyasınan başarıldı.

İrina VLAHın Ankarada gezisi Üredicilik kompleksından COVID-19 vaktinalarından

Küçük ayın (fevral) 21-23 günnerindä Gagauziya Başkanı İrina VLAH yaptı bir gezi Ankaraya, neredä buluştu Türkiye Respublikası Prezidenti Recep Tayyip ERDOĞAN, Türkiye Respublikasının dışışleri Bakanı Mevlüt ÇAVUŞOĞLU, Türk İşbirlii hem Koordinatıya Agenstvosu (TİKA) Başkanı Serkan KAYALAR, Türkiye Respublikasının Sport hem gençlik Bakanı Mehmet Muharrem KASAPOLU.

Küçük ayın (fevral) 22-dä Gagauziya Başkanı İrina VLAH, Ankarada bulunarak, ayırı-ayırı buluşmuş Türkiye Respublikasının dışışleri Bakanı Mevlüt ÇAVUŞOĞLU, Türk İşbirlii hem Koordinatıya Agenstvosu (TİKA) Başkanı Serkan KAYALAR.

Buluşmalarda incelenmiş Türkiye tarafından Gagauziyada yapılan proektlar hem plannar. Onnarın arasında Gagauziyaya COVID-19-za karşı koymakta yardımna da varmış. Detallı olarak Gagauziya Başkanı istemiş Türkiyeden COVID-19-dan vaktinaları yardımı, bildirir başkanın saytı.

Bundan kaarä detallı incelenmiş Gagauziyada “Recep Tayyip ERDOĞAN üredicilik kompleksi”n yapılması, Komrat stadionunun başılması, Vaşkaneş tarafında su hem kanalizatıya geçirilmesi proektı h.t.b.

Gagauziya Başkanı şükür etmiş Türkiye tarafına o yardımna için hem teklif etmiş Türkiye Respublikasının dışışleri Bakanı Mevlüt ÇAVUŞOĞLU gelsin Gagauziyaya sport kompleksin ofițial açılışına hem TİKA Başkanı



Türkiye Respublikasının dışışleri Bakanı Mevlüt ÇAVUŞOĞLU, buluşmakta.

Serkan KAYALAR da buyursunna “Recep Tayyip ERDOĞAN üredicilik kompleksi”n temel atması sırasına.

Buluşmalarda pay almış Türkiyeden Moldova Bükkelçisi Dimitriy KROYTOR da.



Türk İşbirlii hem Koordinatıya Agenstvosunda (TİKA) Gagauziya Başkanını karşıladı TİKA Başkanı yardımcısı Mahmut ÇEVİK, nedän sora bütün delgatıyayı kabul etti TİKA Başkanı Serkan KAYALAR.



Türkiye Respublikasının Sport hem gençlik Bakanı Mehmet Muharrem KASAPOLU, buluşmaktan sora.

Taa bir buluşma Ankarada olmuş Türkiye Respublikasının Sport hem gençlik Bakanı Mehmet Muharrem

KASAPOLU, neredä genä kaldırılmış soruşlar, ani ilgili Komrat stadionunun düzülmesinnän.

Bundan kaarä Gagauziya Başkanını yalvarmış Türkiye ministrusunu Mehmet Muharrem KASAPOLU, taa da çok yardım etsinnär Gagauziyaya sport kompleksına hem başka erlerä türlü oborudovaniya hem mebel vermesinnän.

Canabisinin saytı bildirir, ani Hem taa bir iş istemiş İrina VLAH Türkiye tarafından – Türkiye Pravitelstvosu yardımcısı olsun Gagauziyada bir Futbol Akademiyasının açılmasında hem türlü başka uurlarda sportların ilerlemesinnän.

Nicä da Türkiye Respublikasının dışışleri Bakanını Mevlüt ÇAVUŞOĞLU, İrina VLAH teklif etmiş Türkiye Respublikasının Sport hem gençlik Bakanı Mehmet Muharrem KASAPOLU, buyursun da gelsin Komratda Gagauziyaya sport kompleksin ofițial açılış yortusunda pay alma deyni.

Türkiye, her alanda Gagauz soydaşlarını desteklemeyä devam edecektir

2021 yılın Küçük ayın (fevral) 25 günü avşamı Türkiye Kişinev Bükkelçisini Gürol SÖKMENSÜERİ, kendisinin diil çoktanka Türkiyeyä vizitinnan ilgili olarak dolaştı Gagauziya Başkanı İrina VLAH, bildirer T.C. Kişinev Bükkelçiliin <https://www.facebook.com/kisinevbe/sayfası>.



T.C. Kişinev Bükkelçiliin sayfası yazêr: “Başkan Vlahın, çok verimni geçän gezisi sırasında TİKA Başkanımızla yaptı görüşmä, Sayın Dışışleri hem da Gençlik hem Sport Bakanlarımızı hem taa da Sayın Cumhurbaşkanımızın kabullerindä elä alınan konular hem olabilir proektlar hakkında Bükkelçimizi bilgilendirmiş hem gezi hazırlanması konusunda gösterilän yakın işbirlii için teşekkürlerini iletmiştir. Türkiye, her alanda Gagauz soydaşlarını desteklemeyä devam edecektir”.

Yalancı yaşlarınan ikiüzlülä bakın!

Küçük ayın 2-dän Gagauziyanın Avdarma küüyündä açıldı COVID-19 testleri laboratoriyası, ama, kıskançlıktan mı osa para beterinä mi, Gagauziyanın öndercileri o laboratoriyayı Küçük ayın 11-dä kapattılar.

Aradan 10 gün geçti da o öndercilerin saytında bölä bir yazı peydalandı «Почему до сих пор в комрате не открылась ковид-лаборатория? ответили в центре общественного здоровья».

Siz sanêrsınız bu yazı ansızdan mı bu gündä peydalandı hem yalancı krokodil yaşları boşuna mı dökülmä başladı?! Sanmayın ölä!

Avdarmadakı laboratoriyanın kapanması hem bu yazının peydalandımasında büyük bir baa var – 21.02.2021 günü Gagauziya Başkanın Türkiyeyä gezisi başlêr. Şindi orada bu yaşlar da dökülecek da cömert Türkiyemiz onnarı görecektir.

Bu arada da haberiniz için: özel laboratoriyalarda COVID-19 bir test için 700 leydän zeedä para alınêr.

Onun yıldızı bugün da şafkını bizä yollêêr

(Raametli Semön POMETKOnun duuma günün 70-ci yıldönümünä)

2021-ci yılın Küçük ayın (fevral) 7-dä gagauzların en anılmış muzikantın, bugün onun adını taşıyan gagauz “Düz Ava” ansamblisinin kurucusunun, “İncäzanaatta Maêstro” raametli Semön Vasilyeviç POMETKOnun duuma günün 70-ci yıldönümü tamamlandı. Muzikant, kompozitor, becerikli hem başarılı organizator, Allahtan incäzanaata baaşlanmış adam, SÊM, nicä biz ona deyärdik, gagauz hem Moldova kulturasında, yıldız gibi parlayıp, 1998-ci yılın Kırım ayında sonsuzlaa vardı, ama onun yıldızı bugün da şafkını bizä yollêêr.



Semön POMETKOya hepsicii ozamannar deyärdilär ölä, nicä rusta geçärdi – Semön Vasilyeviç. Ama en yakınnarı hem onu sayannar ona büyük saygıylan SÊM deyärdilär. Bu Sêm adı haliz bir şannı adtı. Zerä, açan ona bölä deyärdilär bu Maêstro annamına gelärdi.

Yazık, ani bölä adamnar unudulêrlar. O şindi kolay baarmaa hem sölemää, ani gagauzlar için hem Gagauzlaa izmet ederiz. Ama ozaman, açan sadä bir yannış adım için vardı nicä herbir işi kaybetmää, baaran yoktu. Gagauzların kulturasına da açıktan izmet edän may yoktu. Kim o yıllarda yaşadı bunu bilir. O üzerä dä Semön POMETKOnun önündä baş iildelim, onun yaratmalarını, çalışmalarını unutmayalım.

Gagauziyada çok festivallär olêr. Lääzım taa bir festival kuralım – onun, Semön POMETKOnun, SÊMın adına.

Onun yaşamasını, biyografiyasını bilelim lääzım.

Semön POMETKO duudu Komrat kasabasında, 1951-ci yılın Küçük ayın (fevral) 7-dä, çiftçi aylesindä.

1958-1967-ci yıllarda ürendi Komradın 2-ci şkolasında. Hep o yıllarda taa belli oldu, ani Semön Vasilyeviç muzıkayı hem folkloru beener. Şkolada olan herbir konşertlerä o katılardı. Açan oldu 11 yaşında, ona baaşladılar ilk muzıka tertipini – garmoniye. Ozamandan beeri o muzıkaylan halizdän badaştı. Bu üzerä dä 1967-ci yılda o Kişinevda muzıka şkolasına kontrabasta üürenmää girdi.

Bu şkolada üürenärkän, 1970-ci yılda Germaniyada olan gençlerin hem studentlerin festivalinä katılêr. Hep o yıllar Kişinevdaki “Veseliye” ansamblisindä çalêr.

1971-dä, muzıka şkolasını bitirip, Semön POMETKO Komratta Kultura Evindä bulunan oyun hem türkü ansamblisindä artistik öndercisi olêr hem bütün kuvedini koyêr ona, ki bu

ansambliyi Moldovada tanısınar. Ansamblinin adı yok, ama onu hererdä tanımaa başlêêrlar.

1972-ci yılın, ilkyaz aylarında ansambliyä veriler “Halk ansamblisi” statusu. Hep o zaman da kolektivin kararına görä, ansambliyä “Düz Ava” adı veriler.

1972-dä, güzün Semön POMETKOyu askerä alêrlar.

1974-tä, dekabrın 31-dä o döner evä. Askerliini yapêr Şostok kasabasında, muzıkacı olarak: klarnettä çalêr. Bu zaman ona teklif ederlär üürensini ileri dooru da olsun asker ansamblilerine dirijor. Ama Semön karar alêr, dönüp Komrada, halkımıza izmet etmää.

1975-tä o genä geler “Düz Ava”ya, da bitki günnerinädän burada önderici olarak çalışêr.

1981-ci yılda Semön POMETKOya “Moldaviya SSR-nın en ii kultura zanaatçısı” adı veriler.



Hep o yılın Semön POMETKO Kişinev İncäzanaat İnstitutun dirijor bölümündä üürenmää başlêêr.

1986-da, Devlet Filarmoniyanın öndercilerinin kararına görä, “Düz



Ava” ansamblisinä profesional adı veriler.

1989-cu yılın Ceviz ayında (sentäbri) Semön POMETKOnun çalışmalarınan Kişinevdaki Ştefan NÄGA adına muzıka kolecinä gagauz hem bolgar uşaklarına deyni bir bölüm açılêr. Semön Vasilyeviç giriş hem başarmak ekzamennär komisiyanın azası.

1993-tän beeri Komrat Devlet Universitetında “Kultura hem incäzanaat” kafedrasında üüredici olarak çalıştı, verip kendi bilgilerini arttan gelennerä.

Semön POMETKO “Moldovanın Kıymetli artisti” adını taşıyardı. Hem şindi ona verildi ad “Maêstro in arta”.

Bütün yaşaması Semön Vasilyeviç POMETKO izmet etti muzıkaya, folklor, gagauz halkına. Bu izmettä bütün kuvedini verip, o tez yanıp, 1998-ci yılın Kırım (dekabri) ayında bizdän ayrıldı.

Todur ZANET

PATRETLERDÄ:

Komrat kultura Binasında Semön POMETKOyu anmak taftası.

4-cü klas. 1962-ci yıl.

I-ci kurs. 15.10.1968-ci yıl.

Semön hem Mariya (kızlık laa-br: Polıtmerskaya) POMETKoların düünü. Saadıçlar – Klavdiya hem Vasiliy BALABAN. 08.05.1976-cı yıl.



TÜRK DÜNNÄSİNDAN ŞİİR

Aida ÊGEM-BERDİEVA duudu 1975-ci yılda. Kırgızistan yazıcılar Birlii azası (1997). On kiyadın avtoru, onnarın arasın-



da altı poeziya toplumu. Kırgızistan Parvitelstvosunun gençler için ödül saabisi (2003). Büünkü gündä Bişkek İ. Arabaev KDUtn Kırgız literaturası hem ona üüretmək tehnologiyası kafedranın başı.

MUTLULUK TA GİTTİ...

Sevgiylän buluşacan
Da uşaklından kopacan.
Bulursan – kaybedersin,
Neyi, neyi taa bekleersin?

İlerdä ne sa bekleer,
Orada sana da var er,
Dan aarmasına bak, gör,
Ondan canına kismet ör.

İnanannar yalan söyleer,
Doorusu sonunda duyulêr:
Gelecek ömürdän gelän ok
Aydınnık, sıcak ta pek çok.

Ko o ok annına ursun,
Orayı nur, kismetlär konsun.
Yaşamak paaları nedir?
Mutluluk gidip, eridimidir?

Herbir iş kolay örüyêr –
Çeliin da paası belinmeer.
Sıradaki günnär alêr ömürü –
Te taa bir günü gömüldü.

Bu akıntı yolunda,
Neetin kimin fikirindä.
Aar akılı kimdän bekleersin?
Eşiktän çevirmää becerersin.

Tenini suuk yapan nedir?
Bizi suuklan kalın yapan nedir?
Kismet neymiş, annamadım,
Mutluluk ta gitti, kalamadı.

SÂN

Hepsi, ne deersin – aslı, pak.
Hepsi, neyi yapêrsın – ak-pak.
Benim beendiim – hepsi sendä var,
Dayma aaradım da – sendä var.

Kolay diil annamaa yarım laftan,
Ya da bir kaş oynatmadan.
Taa da zor uymaa lafına,
Aklımnan da – aklına.

Senin beklediin – aydınnık bir şafk,
Bän varım mı onun içindä, ya bak –
Bu bir soruş... Ayın raatlı gibi –
Senin o susmanın ilinnii.

Geçteki yıllarına baalar
Var benim içimdä, bu hiç diil zarar.
Sansın bireri toplu Zamannar
Sana baalı...

senin aracılınnan baalı onar.

Hepsi, ne deersin – aslı, pak
Hepsi, neyi yapêrsın – ak-pak.
Ama canın hiç diil bir Tanrı,
O da yanıldıynan yanılêr... yanıldı.

Gagauzçaya çevirdi Todur ZANET

Gagauziya Başkanından ödüllər yaamuru

2021-ci yılın Küçük ayın (fevral) 18-də Gagauziyada genə Gagauziya Başkanından ödüllər yaamuru yaadı. Gagauziyanın zaametçi insannarına ordennar, kıymetli adları hem gramotalar verildi. Verilmə sırası Gagauziyanın Regiona resim Galereyasında oldu.

“Gagauziya (Gagauz Yeri)” ordenını kabletililär:

Konstantin Vasilyeviç KELEŞ, Çadır kasabasının “At-prolin” tamazlık at fermasının direktoru;

Konstantin İvanoviç KURDOĞLU, üredici, istoriyacı, yazıcı, jurnalist;

İliya İvanoviç STAMAT, Moldova Respublikasının içişleri organnarın veterani.

“Mihail Çakır” ordenını kableti:

İvan Vasilyeviç LÜLENOV, Komrat muzika şkolasının eski direktoru, pedagog.

“Gagauziyanın şannı vatandaşı” adını kabletililär:

Pötr Dimitrieviç TOPÇU, “Tomay Vineks” Akşioner Birliin direktoru;

Pötr İlyiç BUZACI, “Garant Auto” SA baş direktoru,

Georgiy Födoroviç SAMSI, “Kongazçık” Akşioner Birliin kır işleri brigadasının brigadırı;

Nikolay Georgieviç VELÇU, Valkanes rayonun Ütülü küüyün çiftçilik çorbacılıın öndercisi.

“Gagauziyanın kıymetli pedagoğu” adını kabletililär:

Anna Georgievna NÄGOVA, Komrat Devlet Universitetin juridika fakultetin özel hakları dooruluun kafedrasının doşenti, istoriya bilgilerindä doktor;

Mariya Aleksandrovna YANI-OGLU, Komrat Devlet Universitetin pedagogika hem psihologiya kafedrasının konferenşiar universitari, bilim doktoru.

“Gagauziyanın erindeki cümne öndercili organnarının kıymetli zaametçisi” adını kabletti:

Marina İvanovna KROYTOR, Gagauziyanın kultura Upravleniyasının estrada hem konşert bölümünün başı;

“Gagauziyanın kıymetli medişina zaametçisi” adını kabletililär:

Vera Kirilovna KALAK, Komrat saalık Merkezinin Cümne medişina hem sanitar gündüz staşionarın başı, terapevt vracı;

Svetlana Mihaylovna DULEVA, Gagauziyanın saalı hem cümneyi koruma Upravleniyasının başı, Çadır kasabası;

Tatyana Vasilyevna VORNİKOVA, Çadır saalık Merkezinin Cümne medişina hem sanitar kuruluşunun analara hem uşaklar medişina yardımında baş speşialistı, pediatri vracı;

Raisa Nikolaevna ŞLÄHTİ-KAYA, Çadır rayon bolnişasının Cümne medişina hem sanitar kuruluşun ne-anatolog vracı;

Svetlana Födorovna GRADİNAR, Komrat İ. GÜRFINKEL adına rayon bolnişasının Cümne medişina hem sanitar kuruluşunun duudurmak bölümün ne-anatolog vracı;

Pavel İlyiç ÇERNEV, Valkaneş rayon bolnişasının Cümne medişina hem sanitar kuruluşun ne-anatolog vracı.

“Gagauziyanın hakları korumaa organnarın kıymetli zaametçisi” adını kabletililär:

Nikolay Alekseeviç TOMAYLI, Komrat polişiya İnspektoratın başı, Gaguziya ATBSinin Polişiya Upravleniyası;



Nikolay Georgiyeviç BAYRAKTAR, Moldova Respublikasının içişleri organnarın veterani;

Pötr Vasilyeviç DİMOV, Moldova Respublikasının içişleri organnarın veterani;

Anjelika Dimitrievna MİHAYLESKU, Moldova Respublikasının içişleri ministerliin pensionerkası.

“Gagauziyanın kıymetli kultura zaametçisi” adını kabletti:

Elena Vasiyevna DANACI, Çadır Dionis TANASOGLU adına gagauz milli teatrusunda aktrisi.

“Gagauziyanın çiftçilik çorbacılı kıymetli zaametçisi” adını kabletililär:

Kozma Georgiyeviç BUBUYOK, Valkaneş “Ghevlandri” SRLnın öndercisi;

Anna Alekseevna FUÇICI, Komrat rayonun Baş küüyü (Kirova) “Ekinnik Yeri” SRLnın baş agronomu.

Gagauziya Başkanın hem Halk

Topluşun Gramotasını kabletililär:

İvan Konstantinoviç TRANDAFİL, Gaguziya ATBSinin Kıpçak küüyünün Boris YANAKOGLU adına teoretik lişeyin fizkulturada üredicisi;

Anna Födorovna MİNKU, Kongaz Süleyman DEMİREL adı-

na moldo-türk teoretik lişeyin erinä getirmäk direktoru, informatikada ürediciyka;

Anatoliy Petroviç RUSULÄK, Rus Köselisi küüyün Grigoriy VİERU adına teoretik lişeyin direktoru, fizikada üredici;

Anna Nikolaevna BOEVA, yazıcıyka;

Sergey Dimitrieviç KARAPİRÄ, Gaguziya ATBSinin Başkanının Duho-voy orkestrasının artisti.

Moldova Respublikası Prezidentın Gramotasını kabletililär:

Anna Harlampievna POMETKO, Gagauziyanın kultura Upravleniyasının incäzanaat, kultura hem istoriya bölümün başı;

Lüdmila Georgievna BABURİNA, Gagauziyanın saalı hem cümneyi koruma Upravleniyasının medişina statitikasında hem analizindä baş zaametçi;

Valentina Mihaylovna TERZİ, Valkanes rayonun Administraşiyasının cümne koruma soruşlarında baş zaametçi;

Tatyana Konstantinovna BARBU, Gaguziya ATBSinin yuştişiya Upravleniyasının daavacılık, natariusluk hem advakatura servişindä baş zaametçi;

Mariya Dimitrievna MAVRODİ, Gagauziyanın üredicilik Upravleniyasının ekonomika soruşlarında hem administrativ-ekonomika statistikası servişin başı.

Moldova Respublikası Prezidentın Gramotasını kabletililär:

Raisa Petrovna MİHNEVA, Gagauziyanın finans Upravleniyasının bütet sistemasının analizi hem otçotluu bölümün baş zaametçisi, buhgalter-finansist;

Pötr İvanoviç İAVANOV, Komrat rayonun Administraşiyasının erindeki cümne öndercili organnarınan çalışmada bölümün başı;

Tatyana Afanasyevna SPATARENKO, Gagauziyanın ekonomika ilerlemesinde hem turizma Upravleniyası başın yardımcısı;

Valentina Petrovna ARABACI, Gagauziyanın gençlər işlerinde hem sportta Upravleniyasında baş zaametçi;

Valentina Georgievna DERMEN-Cİ, Devlet kanşeläriyasının Komratk Teretorial Bürosunda baş zaametçi;

Silviya Georgievna TOMAYLI, Gagauziyanın agroindustriya Upravleniyasının toprak fondu hem kadastra bölümün başı.

Moldova Respublikası üredicilik, kultura hem aaraştırma ministerliin Gramotasını kabletililär:

Olga Mihaylovna KİRİTA, Çadır Valentin MOŞKOV adına teoretik lişeyindä angliycada hem nemşeycedä ürediciyka;

Alla Petrovna SAMSI, Çadır P. KAZMALI adına gimnaziya himiyada hem biologiya ürediciyka.

Foto: gagauzinfo.md

“Mihail Çakır” ordenı hak edän İvan Vasilyeviç LÜLENOV

2021-ci yılın Küçük ayın (fevral) 18-də Gagauziya Başkanın elindän ödülleri kabledenlerin arasında vardı Komrat muzika şkolasının eski direktoru, pedagog hem pek islää bir insan İvan Vasilyeviç LÜLENOV, angısına “Mihail Çakır” ordenı verildi.

Bu adam için isterim taa derindän birkaç laf söylemää, zera Canabisi ömürünün taa çok payını baaşladı muzıkaya hem gençlerä muzika dünnääsını açmak izmetinä, 45 yıl işleyip Komrat muzika şkolasında. O 45 yıldan 20 yıl da şkolanın direktoruydu, angısı onun çorbacılı altında oldu Moldovanın en islää muzika şkolaların birisi, neyi gösterer o çok üüsek ödüllär, ani şkola üürencileri tarafından kazanıldı respublikadaki hem halklararası konkurslarda, neresi onnar katıldılar.

Kendisi cömert hem gülär üzlü oldu için, becerdi muzika şkolasında toplamaa hem birleştirmää profesional bir kolektivi, angısınnan bilä, en zor vakıtları aşip, şkolayı en üüsek uura getirdi. Bu uurdan aşaa inmeyip, ozaman da, açan şkolanın eni binası yapıldı da, var nicä demää, ani may sokakta lääzımdı üüretmä proşesını ilerletmää, Canabisi çalıştı, ani bu şkolada açılısın zanaatlar, neredä uşakları üürederlär gagauz



milli instrumentlarında da çalmaa.

Şkolanın prestiji büüdükçä burayı konşertlarla başladılar gelmää anılmış gagauz, moldovan, rus, bulgar kompozitorları hem şkolayı başaran muzikantlar, göstereräk kendi ustalıklarını hem vereräk uşaklara hem da burada brakarak cannarının birär parçacıklarını.

İvan Vailyeviç LÜLENOV, kompozitor olarak, katıldı Gagauziyanın “GAGAUZLUK” Cümne Birliin tarafından hazırlanan hem gagauz kulturesinin altın fondu olan “Gagauzların kayıp olan dilinin hem kultura adetlerinin Moldovada korunması” Proektına (bak: <http://anasozu.com/bu-kiyatlar-gagauz-kulturasinin-altin-fondu/>). Burada Canabisi söktü hem notalara koydu gagauz halk türkülerini, ani proektın kiyatlarında tiparlandı.

Biz kutlêeriz Canabisini bu büyük ödüllän hem dileriz kendisine saalıklan uzun ömür.

Akademik Todur ZANET

Lidiya TODİEVAdan Gagauzlara “Çadırın 2021 ayaz gergefi”

Çadır kasabasının Uşak yaratmak Merkezin “L” adlı Modalar Teatrusunun modelleri vazgeçmeer bizi şaşırtmaa! Bu teatrunun öndercisi Lidiya İvanovna TODİEVAnın tarafından hazırlanan “Çadırın 2021 ayaz gergefi” eni gagauz milli kostümlerin gösterisi genâ büüledi dolayı. Lidiya İvanovna TODİEVAnın hazırladığı giyimlerin gösterisi için uzun zaman kaarlı hem ayazlı bir kış havası beklenildi da, açan o hava peydalandı, “L” adlı Modalar Teatrusunun modelleri bu kolaylı kaçırmadılar.



(soldan saa tarafa) Kseniya KELEŞ, Kristina GİSKA, Anna ÇAVDAR, Mariya KOL, Artöm KALÇU, Valeriya PATOSKA, Valeriya TELPİZ hem kızak üstündä oturêr Lidiya İvanovna TODİEVA.

(soldan saa tarafa) Oksana KURDOĞLU, Tatyana SARIOĞLU, Nastâ STANKOVA, Kristina KAVALCI, Ekaterina NİKOLAEVA hem Valeriya TELPİZ.

“ANA SÖZÜ”Gagauz dilindä gazeta
Çıkâr 14.08.1988 beeri

Kurucu “ANA SÖZÜ” S.R.L.
Sertifikat No. 1003600086420

Todur ZANET
Baş redaktor

İndeksi - PM – 21358

Gazeta “Universul” basım evindä basılêr
Tiraj – 3020 ekz. Sımarlamak No: 124

YAZIŞMA ADRESİMİZ:
RM – 2028, Moldova, Kişinêu,
c/p Nr. 1025. Tel/fax: 022 28-18-04
e-mail: todur.zanet@gmail.com
zanet@anasozu.com